



**Selasa, 24 Nopember 2020**

**Ogen: Johanes 5:1-9**



**La Lit Sinampati**



**T**eman tawa ngenca mbue teman tangis e labo lit... megati si begi pengerana si bagenda rupana. Engkai ndia maka bage? Sabap kinata kegeluhen, tupung reh perbeben nderpa kita, i je me maka si idah labo kepe ngasup teman setia nemani ras nampati kita. Sekalak si pinakiten 38 tahun i duru kolam Bethesda, nenganami kiniseran ras kearun ate si mbelin. Sedekah e me ia nimai penampat ise nge si nggit maba ia masuk ku kolam sangana reh malekat ku kolam e, tapi sada pe labo lit si ngarakken ia. Ntah i ja nge ndia sima-simana ntah temanna meriah gia, makana nggo bage dekahna la termasukkena bana ku kolam e. Padahal perlu kal ia sinampati gelah ia si tantangna masuk ku kolam sanga reh malekat e. I bas ia ertima e, la lit si nampati, emaka payo nge nina kata Dibata "*Emaka ula nai ernalem man manusia si ermasap-masap*" (Jes.2:22). Tapi anem bage gia pengarapenta labo banci luntur, sabap la lit gia manusia si nampati adi si timailah penampat bas Tuhan nari, lit nge lalap serpang puluh. Ndekah gia ertima, 38 tahun i duru Kolam Bethesda labo sia-sia, dungna kalak cempang ndai jumpa ras Tuhan Jesus si ngubahken kegeluhenna. Labo kepe bagi carana rukur, arus masuk ku kolam Bethesda maka malem, tapi alu cara Tuhan Jesus jine. Labo arah lau Kolam Bethesda tapi arah PerkatanNa. Payo lit kuasa i bas kolam e guna mpepalem kalak si sakit, tapi terbatas kal kuasana sebab sada ngenca terpepalemsa tupung erburak launa. Tuhu lit kuasa bas doni enda tapi ndauh belinen Kuasa Tuhan Jesus e. IA ngasup pepalemken pinakit manusia i japa pe ras katawari pe. Kuasa doni erbatas, kuasa Jesus la erbatas. Janah ietehNa keperlun kerina jelma seh ku pusuh peraten si mbagesna kal pe iangkaNa ras IA dem alu perkuah ate. Em dalanna ijumpaiNa sekalak perbapan si enggo 38 tahun pinakiten. Tuhan Jesus e nggit jadi teman man ise saja pe, IA erkuasa ras nggit nampati, janah lalap IA erlebuh man kalak si latih dengen beraten guna reh ndahi IA. Sabap sura-suraNa pe nampati kalak si i bas kepicien.

☞ "*Kemusilen si mbelinna eme adi siakap la lit si erkeleng ate banta*"